

劉夢得文集

開化圖書館

Kaifuwa library

開化圖書館

Kaishwa Library

開化圖書館

Kaishua library

開化圖書館

Kaishua library

劉夢得文集卷第十五

表

並代淮南杜相公佑作

代讓同平章事

代謝平章事

代謝手詔

代謝貸錢物

代謝赴行營

代謝加朱鄭官

代賀赦吳少誠

代賀除虔王

代慰公主薨

代慰王太尉薨

代讓同平章事

臣某言高品吳千金至奉制某月日加臣銀青光祿大夫同中書門下平章事兼徐泗濠等州

節度使觀察處置等使餘如故者初受恩榮若
登霄漢退思塵忝如履春冰臣某誠惶誠恐頓
首頓首臣聞以德詔官以勞定賞苟或虛授人
無勸心臣自守方隅累更時歲荷唐虞宣力之
寄乏齊魯報政之能愧無可稱以荅高位豈意
聖慈弘獎天澤荐加以燮贊之崇名被庸虛之
陋質懼速官謗有玷大猷伏以宰相之職安危
是注其在當否繫于慘舒惟以材昇例無平進
舉不失德則副蒼生之心苟非其人或致外夷
之哂臣雖愚昧嘗覽前言豈敢冒榮遂安竊位

輒思事理冀盡藹蕤若以汴河要津漕運所切
徐方倣擾師旅未寧謹當上稟睿謀下貞師律
剋期而進屈指可平勵衆率先是臣之志旣行
其事必在正名所加節制安敢飾讓至於銀青
貴服金鉉重名勲績無聞豈宜濫及伏乞賜寢
前命俯亮愚衷微臣有知止之宜聖朝無不稱
之服名器斯慎退讓有聞遐邇聆風孰不知勸
其新授官告謹重封進無任

代謝平章事

臣某言伏蒙獎拔超踐鈞衡慮玷大猷昧死陳

讓再奉嚴旨不令固辭恩厚命輕位高責重謝
臣聞天下安危注意將相處論道具瞻之地當
總戎作鎮之權雖協夢而求無聞秉鉞之寄登
壇以拜不兼調鼎之榮授受惟艱伊昔猶爾況
臣庸瑣何以克堪陛下立造曲成大明私照俾
掌戎律復參廟謨寵光之崇在臣已格毫髮之
效於國何施謹當罄竭微誠奉遵至教仗天威
以攝不類敷聖澤以遂羣生上分旰食之憂下
塞素餐之責力誠不足心實念茲伏乞皇明俯
賜昭鑒臣恪居官次遐守藩維不獲伏謝彤庭

陳露丹慊心存闕下同犬馬之戀恩身在淮濱
仰雲天而結思無任

代謝手詔

詔後批云
朕自書

臣某言中使問忠信至奉宣聖旨存問兼賜臣
手詔拜捧紫泥跪伸金簡承旨見聖神之略感
恩知身命之輕中謝臣素乏異能幸逢昌運猥當
旄鉞之寄未靖杖氣榮分台鼎之名何階啓沃
竊位斯久速尤是虞豈謂玄化曲成鴻私荐及
特紆眷思親灑仙毫降自九重粲然五色初喜
麗天之象遠燭輝光旋驚垂露之蹤曲覃霈澤

鸞鳳騫翔而變態煙雲舒卷以呈姿賦彩飛文
聳神蕩目恭惟國寶何幸家藏感極涕零莫知
上荅應緣軍旅庶務謹具別狀奏聞無任

代謝貸錢物

臣某言中使南宮懷珍至奉宣聖旨存問兼賜
臣墨詔天光下濟睿澤曲流銜恩未酬居寵彌
懼中謝臣受任斯極微功莫施昨以封略未寧干
戈猶動壽春固壘以備盜淮甸興師以扞姦經
費所資數盈鉅萬餽餉時久供億力殫慮始圖
終不敢緘默輒陳管見上黷宸聰伏蒙聖慈特

遂誠請遠承如綽之旨特假聚人之財軍須不
愆士氣彌振糗糧既備永無半菽之虞襦袴足
頒遠超挾纊之感是為悅使咸願先登臣忝總
戎倍百欣荷伏以上分國用俯濟軍興候清煙
塵謹備償納無任

代謝赴行營

臣某言臣自守淮濱已周星紀虔奉朝典粗安
遐方素效未聞新恩荐及身曳兩綬寄深一隅
蚊蚋負山力誠不足鷹鷂逐鳥志則有餘臣再
授兵符夙參軍幕被堅執銳雖未經於戎行制

勝伐謀亦嘗習於事業自忝藩翰屬時清平無
施汗馬之勞但詠橐弓之什今則幸遇殊獎委
之專征以臣率先是臣素志沉聞徐州士衆本
無叛心倉卒之間危疑至此臣請自臨疆場親
領紀綱裂帛繫書諭其禍福一作悔椎牛饗士養以
威聲冀宣皇風煦茲蠢類以忠義感脅從之伍
以含弘安反側之徒革面悛心期乎不日其楊
州留務請令行軍司馬路應權知伏乞聖慈俯
賜照鑒無任

代謝加兵馬使朱鄭官

初除侍御史續
除中丞異姓王

臣某言奏事官韋溫回特蒙聖恩重賜朱鄭等
官告宸象昭回煥然下燭榮分右職光賁遐藩

中謝臣伏以朱鄭朴忠爲心沈毅見色當建封禦

侮之寄見張愔提孩之年昨者隸職徐州分鎮
蘄縣繹騷之際綆亮彌彰歷險而來寔繁其旅
詳探本末有足褒稱輒具奏聞恐須獎勸伏蒙
睿鑒俯亮微誠優詔先行已階直指之日殊私
荐至超昇獨坐之崇戶領三千爵踰五等恩生
非次感異常倫轅門有光武旅增氣遂使感激
之士希勇爵以捐軀猖狂之徒聆聖澤而悛性

風行草偃其勢必然臣忝總戎倍百欣荷無任

代賀赦吳少誠復官爵

臣某言中使宋惟澄至奉宣聖旨存問兼賜臣
墨詔及昭示洗雪吳少誠等事天地弘覆燾之
恩雷雨施渙汗之澤瑕累咸滌危疑獲安中謝臣

伏以少誠擅興兵戈事生詿誤自王師致討天
威下臨曾無悖辭但聞引咎初懷疑懼雖擁衆
以偷生旋感聖神屢拜章而請命陛下仁深解
網慮軫納隍念餽餉飛輓之勤閔戰爭暴露之
苦舉茲宥過之典副彼效順之誠一方承再造

之恩九有覩惟新之化敷鴻霈而覃及蠢類鼓
仁風而臻于大和罷柝銷鋒自茲而始臣謬膺
重寄虔守遐藩不獲稱慶瑤墀陳露丹懇仰瞻
宸極倍百常情無任

代賀除虔王

臣某言中使李國真至奉宣聖旨存問兼賜臣
墨詔鴻澤浹下大明燭幽曉諭便蕃慰安稠疊
中謝臣伏觀天書恭承睿旨弘愛人屈已之道酌
因時適變之宜擇賢王作鎮徐方俾張愔便主
留務上則成邦家盤石之固下則副士衆拜章

之請戚藩之寄斯重舊勲之祀獲全丕變猖狂
之徒咸躋仁壽之域旣弘在宥坐見止戈率土
人臣孰不欣悅臣素乏方略謬荷寵光猥塵將
相之名無施分寸之績遭逢若此報效蔑聞官
謗已興渥刑宜及陛下恩深覆載道務舍弘恤
公私餽餉之勤念吏士鋒鏑之苦特紆神筭昭
發德音危疑獲安制宜惟固好生宥過誠陛下
開網之仁尸一作有位無功重微臣素餐之責周章
跼躄胡顏自安但以遐守藩條恪居官次不獲
叩謝雲陛陳露血誠未遂周任知止之言敢逃

臧文竊位之咎無任

代慰義陽公主薨

臣某言伏承義陽公主薨伏惟聖懷傷悼增切
伏以公主妍姿令則冠絕天人稟教皇宮已挺
柔嘉之德降嬪卿族益彰貞粹之儀方期作範
壺闈長榮邱第豈意遘茲短曆奄謝昌辰伏慮
陛下軫念未捐深慈莫遣有虧常膳罷設宮懸
臣子之情不任惕戀況聖凡禮異家國制殊伏
願道齊殤彭理達修短割肌膚之愛慰寰海之
心率土人臣孰不相慰無任

代慰王太尉薨

臣某言伏承成德軍節度使太尉兼中書令王
武俊今月某日薨歿伏以武俊生逢昌時天授
忠節奮揚義勇茂建勲庸秩冠朝端參燮和於
台鉉姻連戚里承嘉慶於雲霄榮掩等夷事高
今昔方膺作翰之寄遽迫歸泉之期鼎臣去亡
梁木斯壞伏惟陛下君臣義重存歿感深臨冊
襚以興懷聽鼓鼙而軫念臣恪居官守奉慰無
階悲慟之誠有加常品

劉夢得文集卷第十五

開化圖書館
Waltham Library

卷之三

八

七

開化圖書館

Wahua Library

劉夢得文集卷第十六

表

並代淮南杜相公佑作

代謝冬衣

代謝濠泗割屬淮南

代謝墨詔

代謝曆日面脂口脂

代請朝覲

代論廢楚州營田

代謝春衣

代謝男師損等官

代謝賜戟

代謝端午日賜物

代謝冬衣

臣某言中使王國清至伏奉聖旨慰勞臣及將佐官吏僧道耆壽百姓等并賜臣墨詔及冬衣

兩副大將衣四副者大明昭回遠燭下土殊錫
稠疊延及偏裨慶抃失圖捧戴相賀謝臣謬承委
寄獲守藩條灰琯屢移塵露無補陛下至仁天
覆玄化風薰頌以兼衣賁茲瑣質降自天府光
于轅門緘滕既開覩綵章之盛飾蹈舞而服發
溫煖於祁寒愧塵補衮之名更荷解衣之賜恩
波下浹將校同霑共戴殊榮咸思竭節生成是
荷雨露難酬無任

代謝濠泗兩州割屬淮南

臣某言伏奉十一月二十九日詔書其濠泗兩

州令臣依前收管臣謬承寵光作鎮淮海位均
九伯權總十連內省無堪常恐不逮豈謂恩私
曲被封略有加慙無報政之勤重受分憂之寄
伏以兵戈方息閭里未安謹當奉宣皇風慰彼
黔首且責成於牧宰期不失於澄清伏惟聖明
俯賜昭鑒無任

代謝墨詔二首

臣某言中使陳日華至奉宣聖旨存問兼賜臣
墨詔又以臣所奏羅珣及裴靖政理有方今各
賜手詔激賞者恩降重霄澤流下土義存獎勸

榮冠等夷謝中臣昨以羅珣裴靖勵精吏理效用著
 明人咸悅安俗致殷阜恐須甄錄以勸在官輒
 獻封章具陳成績伏蒙睿鑒俯亮愚衷載嘉理
 行之尤光示絲綸之旨守道者益以固志懷慝
 者由是悛心激俗化人於茲為大謬司廉問職
 在澄清幸遇旌善之時獲免蔽賢之責無任

又

臣某言中使陳日華至奉宣聖旨慰勞臣及將
 佐官吏僧道耆壽百姓等兼賜臣墨詔恩降紫
 泥澤流下土跪奉自天之命遙馳捧日之心謝中伏

以皇帝陛下凝旒穆清軫念黎獻已洽雍熙之
化尚存宵旰之勤遠降王人特紆宸翰慰安稠
疊曉諭便蕃任重力微不知上荅應緣戎旅庶
務謹具別狀奏聞伏乞皇明俯賜昭鑒無任

代謝曆日面脂口脂等

臣某言中使霍子璘至奉宣聖旨存問臣及將
佐官吏僧道耆壽百姓等兼賜臣墨詔及貞元
十七年新曆一軸臘日面脂口脂紅雪紫雪并
金花銀合二金稜合二皇明遠燭恩錫荐臻抃
舞失容捧戴無措謝中伏惟皇帝陛下立極御人順

時布政禮崇大蜡澤浹遐藩臣叨榮日深竊位
時久謬迴宸眷猥降王人天書下臨覩三光之
照耀玉曆爰授知四氣之環周雕奩旣開珍藥
斯見膏凝雪瑩含液騰芳頓光蒲柳之容永去
癘疢之患命輕恩重上荅何階無任

代請朝覲

臣某言臣聞臣之事君有犯無隱懇誠所至敢
不罄陳伏惟聖明俯賜矜察中臣伏受國恩忝承
門蔭脫巾筮仕敢期榮名陳力效官靡樹聲績
始因孤直驟歷清班復加朝章作藩外府遠違

輦下十有四年恪守淮瀆逮今一紀犬馬懷戀
寢興匪遑蒲柳易衰遲暮俄及竊位時久妨賢
愧深沉歷官已來四十八考祇奉朝謁時纔二
周服勤郡符荏苒垂老屏營魏闕之思夢想承
明之游如迫饑寒不忘衣食伏惟睿鑒俯亮愚
衷早賜擇人與臣交代授受之際冀無可虞然
後脂車奔赴京輦微願斯畢雖死猶生臣頃以
戎務方殷猥加宰輔今既事罷實慙此名爲有
藩鎮同時未敢輕上印綬伏惟聖朝赫赫左右
惟賢漢愧得人周慙多士臣才略旣短齒髮又

衰柄用之地甘心自絕所冀退歸舊里沐浴皇
風絕鍾鳴漏盡之譏展維桑與梓之敬匪惟名
器不假實貴骸骨可全知止之心神祇所鑒
無任

代論廢楚州營田

臣某言中使曹進玉至奉宣聖旨存問兼賜臣
墨詔以楚州營田廢置事令臣商量奏來者跪
捧天書恭承睿旨道存致用義在隨時中伏以本
置營田是求足食今則徒有糜費鮮逢順成刈
穫所收無裨於國用種糧每闕常假於供司較

其利害宜廢已久比來循守舊制不敢輕有上
陳皇明鑒微特革斯弊取其田蓄授彼黎蒸仍
俾薄租誠為至當但以田數雖廣地力各殊須
量沃瘠用立程度臣已追里正臣與商量利便
謹具別狀奏聞伏惟聖慮俯賜詳擇無任

代賜謝春衣

臣某言中使陳日華至伏奉聖旨慰勞臣及將
佐官吏僧道耆壽百姓等并賜臣墨詔及春衣
兩副大將衣肆副王人捧詔御府降衣寵光不
隔於遐藩慶賜猥霑於裨將中臣素乏器能謬膺

驅使每慙效薄常懼食浮陛下覃以至仁均其
厚施宰元和而布澤順時律以頒衣出自禁中
賁于臣下執領禮而抃舞失次被織柔而顧盼
增輝舉體動容既安且吉在身不稱恐招鷩翼
之譏居位無功叨受鶴紋之賜下延將校同荷
生成無任

代謝男師損等官

伏覩今月一日制授臣長男師損秘書省著作
郎次男式方太常寺主簿又得進奏官裴邁狀
報伏承聖恩特降中使送官告到臣宅付師損

等者寵渥非常授任不次驚躍無措覩懼失容謝中
臣謬分重寄獲守外藩受恩既深無績可紀男
師損等器惟凡品教闕義方早沐睿慈已階官
次每懷塵忝常誠滿盈豈謂鴻霈曲覃大明私
照寬臣尸素之責念臣葵藿之誠下延脣息叨
踐班級天書出禁中貴臨門榮冠等夷慶流宗
族況著作乃論撰之地唯才史是居太常寔禮
樂之司非儒者勿履顧茲庸昧忽此超昇內省
慙惶若墜冰谷伏以聖朝立制建官惟賢名實
無乖輪轅盡適微臣父子獨為幸人非據踰涯

自中徂外虛受丘山之賜實增負乘之憂進退
彷徨不知所據無任

代謝賜門戟

臣某言臣得進奏官裴邁狀報今月九日軍器
使梁延壽奉宣進百付所司准省牒賜臣門戟
十二竿者恩降雲天榮加門戶承旨慶抃省躬
慙惶伏以禮著等威朝有命數是昭懋賞必在
疇庸臣謬荷寵光素無績效旌旄之寄已忝外
藩榮戟爰列更光私第賁于棖闌慶及子孫覩
茲盛儀實愧虛受無任

代謝端午日賜物

臣某言中使劉元弼至奉宣聖旨慰勞臣及將
佐官吏僧道耆壽百姓等兼賜臣墨詔并衣壹
副金花噐參事綵絲壹軸大將衣肆副綵絲伍
軸寵光荐至慶賜曲霑抃舞失容捧戴無力

中伏謝

以朱明仲月端午佳辰萬國被薰風之和九天
垂湛露之澤臣幸逢休運獲守外藩叨承睿慈
猥受榮賚發詔而煥窺宸象振衣而頓失炎威
色絲表祥載光於佩服珍噐充玩盡飾於圓方
恩輝旣盈喜懼交集下延裨將共荷鴻私無任

劉夢得文集卷第十六

華北圖書公司
Wahwa Library

劉夢得文集卷第十六

七

劉夢得文集卷第十七

表

代讓鹽鐵等使

代謝追贈

代讓立去思碑

代賀遷獻懿二祖

代賀雨止

代賀祈晴獲應

代謝許折糴

代賀元日祥雪

代賀春雪

代賀雨

代謝紫雪面脂

代謝鍾馗等

又代謝鍾馗等

代謝新茶

代謝春衣

代謝新橘

代謝柑子

代謝冬衣

代杜司徒謝讓度支鹽鐵等使

臣某言伏奉制書授臣檢校司徒同中書門下
平章事充度支及諸道鹽鐵轉運等使者臣久
塵高位尸素已多更受新恩滿盈為懼謝中伏惟皇
帝陛下紹登寶位光纂鴻猷擢用之間華夷聳
聽況利權所在宜適變通國計是資須明輕重
當至化鼎新之日在微臣遲暮之年將何以上
副宸衷下成庶務進退惟谷冰炭是懷輒罄愚
誠冀迴天監陳力無補庶遵周任之言循涯若

驚敢飾范宣之讓慙惶跼躄倍百常情

代杜司徒謝追贈

臣某言伏奉制書褒贈臣亡父先臣某官某尚
書左僕射者時逢霈澤禮極徽章中謝臣家受國恩
至臣累葉常懼不克負荷以忝前人豈意多幸
遭逢猥居高位陛下應乾御極作解庇人恩浹
寰區禮成宗廟垂仁布德自葉流根紫書忽降
於重霄密印榮加於厚夜霜露增感蒸嘗有輝
非臣殞越所能上報無任

代杜司徒讓淮南立去思碑

臣某言伏見淮南節度使王諤所奏當道將吏
僧道耆壽百姓等請為臣立去思碑伏奉聖旨
允其所奏臣內惟菲薄聲績無聞祇荷恩私慙
懼交至謝中臣伏蒙先朝過獎累典方隅頃鎮江都
十有四載數周星紀水旱備經境接淮濱兵戈
時起至於邑里粗免流離非臣所能悉稟聖化
在唐堯可封之日奚假吏師當漢宣責實之時
皆承認旨王鐸與臣交代輒有上聞況以去思
為名慙無可紀之績伏以建碑有制甲令垂文
苟非至公翻益貽誚臣伏覽故事宋璟自廣州

都督入爲尚書南海之人請爲刊石璟自遜讓
至于再三雖勒其文竟從降制著在國典垂爲
美談璟非苟榮人益見德臣才誠不逮心寔慕
之伏乞聖慈賜寢前命臣情非飾讓義在徇公
無任

代京兆李尹賀遷獻懿二祖實

臣某言伏見詔書以今日某日奉遷獻祖懿祖
神主柎于德明興聖皇帝廟盛禮云畢宗桃永
安中謝伏以太祖景皇帝膺期撫運啓封于唐爲百
代不遷之宗開三靈眷命之兆頃以本朝初建

清廟備儀二祖冠西室之先景皇闕東嚮之位
諸儒獻議歷載未行陛下濬發睿謩旁延正論
爰詔多士會於中臺酌三禮之前一作全文參百王
之故事講貫斯定詢謀僉同撰日展儀考祥視
履配貴神於遠祖正尊位於始封廟貌有嚴禘
嘗允穆示人以孝得禮之中既觀秩秩之容必
降穰穰之福臣職為內史屬忝本枝躬道盛儀
獲申誠敬無任

代京兆韋尹賀雨止

夏卿

臣某言今月某日中使吳文政奉宣聖旨緣今

年雨多恐損麥苗稼諸有靈跡處並宜祈禱者
臣謹檢尋祀典方議遍祠惟德動天倏已澄霽
謝中伏以至教惠農兆人務本今歲宿麥茂於常年
爰自季春遂逢多雨蓋陰陽常數有以推遷而
隴畝之間未聞傷敗陛下勞謙思切覆育恩深
或慮成災先期軫念昭薦未陳於方社睿誠已
格於上立文明煥開陰暘潛掃有年之慶寔兆
於茲辰先天不違夙超於前代臣謬司京邑虔
撫蒸黎欣抃之誠倍百羣品無任

代京兆韋尹賀祈晴獲應

臣某言今月十七日中使某奉宣聖旨以霖雨未晴諸有靈跡處並令祈禱者臣當時於興聖寺竹林神親自祈祝兼差官城外分路徧祠伏以神祇效靈景物開霽兆庶覩動天之德大田俟多稼之期臣謬荷恩輝忝司京邑無任

代京兆韋尹謝許折糴

臣某言伏奉詔旨以臣所請畿內折糴宜令度支計會定數奏來者天慈廣被人瘼是求中旨理京邑不先威刑唯務便安所期富庶每因賜對常奉德音府縣之間巨細令奏伏以聖明在

上風雨應時順成之年穀糴常賤若無輕重之法必利兼并之家輒敢上聞請行折糴天光下燭幽隱無遺宣付所司允臣所奏事關理本惠及生靈臣忝尹京倍百欣荷無任

代京兆韋尹元日賀雪

臣某言伏以去冬已來久無雨雪臣每於內殿親奉德音以宿麥未滋爲虞以北人生疾爲念聖情所屬神理潛通獻歲發春佳雪肇降當夷夏會同之日覩天人合應之徵迎喜氣於三元浹歡心於萬國癘疢永息豐阜可期臣以疾沴

未平趨步有阻伏蒙恩貸以具奏聞謹於光宅
寺中勾當本務不獲隨例稱慶明庭既覩嘉祥
益彰聖德無任

代京兆韋尹賀春雪

臣某言伏奉詔旨充某郡主禮命使謝恩之日
親承德音以春初已來雨雪猶少慮妨農事有
軫睿慈今當下嫁之辰克致上玄之感雲生河
漢及佳期而降祥雪滿寰區應豐年而呈瑞臣
官當撫字職在肅雍慶抃之誠實倍常品

代京兆李尹賀雨

臣某言臣伏奉進旨以時雨愆候有妨農耕應
諸有靈跡處並令祈請者德音才發膏雨驟飛
滂霈已周動植咸悅謝中伏以乂愆時澤上軫聖慈
爰命禱祈俾申誠敬神應如響天且不違未興
雲漢之詩已致桑林之雨臣謬司京邑虔撫黎
蒸覩豐年之可期同比屋而稱慶無任

代李中丞謝賜紫雪面脂等文

臣某言中使某至奉宣聖旨賜臣紫雪紅雪面
脂口脂各一合澡豆一袋特降玉人俯臨私第
銜恩慶抃省已慙惶謝中臣謬荷寵私素無績效空

變星霜之候猥霑慶賜之恩跪捧雕奩榮觀珍
藥功能去疾永絕於癘疵澤可飾容頓光於蒲
柳生成是荷雨露難酬無任

代李中丞謝鍾馗曆日

臣某言中使某奉宣聖旨賜神畫鍾馗一新曆
日一軸恩降雲霄光生里巷雖當歲暮如煦陽
和中伏以將慶新年聿循故事續其神象表去癘
之方頒以曆書敬授時之始微臣何幸天意不
遺無任

又代杜相公謝鍾馗曆日

臣某言高品某至奉宣聖旨賜臣畫鍾馗一新
曆日一軸星紀分回雖逢歲盡恩輝忽降已覺
春來伏以圖寫威神驅除羣癘頒行律曆敬授
四時施張有嚴既增門戶之貴動用協吉常爲
掌握之珍瞻仰披尋皆知聖澤無任

代武中丞謝新茶

元衡
二首

臣某言中使竇國宴奉宣聖旨賜臣新茶一斤
猥降王人光臨私室恭承慶賜跪啓緘封中伏以
方隅入貢採擷至珍自遠貢來以新爲貴捧而
觀妙飲以滌煩顧蘭露而慙芳豈柘漿而齋味

既榮凡口倍切丹心無任

又

臣某言中使某乙至奉宣聖旨賜臣新茶一斤
猥沐深恩再霑殊錫承旨慶抃省躬慙惶謝伏以
貢自外方珍珠衆品效參藥石芳越椒蘭出自
仙廚俯頒私室義同推食空荷於曲成責在素
餐實慙於虛受無任

代武中丞謝春衣

臣某言中使某奉宣聖旨賜臣春衣一副正人
臨第御府降衣抃舞失容捧戴無措謝伏以律曆

當春暮慶洽時雍萬物被薰風之和九天垂湛
露之澤臣受任非次速尤是虞方懷匪服之憂
更荷解衣之賜恩加盡飾拖朱紫以為榮受非
以庸顧形影而增媿丹誠徒罄立造難酬無任

代武中丞謝新橘

臣某言中使某乙至奉宣聖旨賜臣新橘若干
顆特降恩光猥頒慶賜珍踰百果榮比兼金中伏謝
以丹實初成苞貢爰至芬馨味重方列於御筵
雨露恩深忽霑於賤品感同推食事等絕甘豈
唯適口為珍實冀捐軀上荅無任

代武中丞謝柑子

臣某言中使某乙至奉宣聖旨賜臣柑子若干
顆特降殊私再頒名果自遠稱責以新爲榮謝中伏
以方貢外來人間未覩黃苞輝穎雕俎增華芬
芳初佐於天庖慶賜遂霑于凡口甘踰萍實剖
食旣同于楚謠寒比柘漿析醒何慙于漢史感
恩思效倍百常情無任

代武中丞謝冬衣

臣某言中使某乙至奉宣聖旨賜臣冬衣一副
恩降重霄榮加陋質承旨慶抃省躬慙惶謝中臣受

任已來微效莫著每更時律慙曠官常豈謂立
造曲成鴻私荐及念茲戒寒之候錫以禦冬之
衣拊舞失容顧眄增飾鶴文是錫遠慙晉代之
賢鶉翼不濡實懼曹風之刺無任

劉夢得文集卷第十七

開化圖書館

Wakhu Library

劉夢得文集卷第十八

表

代竇中丞謝上

謝中使送至郡

賀收蔡州

賀赦

賀策皇太子

慰國哀

賀龍飛

賀冊太皇太后

賀冊皇太后

和州謝上

賀改元赦

夔州論利害

夔州謝上

賀雪鎮州

賀平淄青

代竇中丞謝上

羣時在朗州相
逢因以見託

臣某言伏奉某月日制受臣容州刺史充本管
經略招討等使伏以道途遐阻水陸縈紆臣以
今日日到本任上訖謹宣聖旨慰諭遠人中臣
本書生素無吏術頃因多幸賁自丘園累沐聖
慈驟居清貫識昧通變動乖事宜愧無善狀以
塞公責伏惟睿聖文武皇帝陛下凝旒清穆洞
照寰海恕臣本性朴愚賜以恩輝被於廢棄遠
僻偏郡重委方隅捧印綬而為榮望闕庭而增
戀雖到官之始惠未及人而率下之人誠務先

克己凡施政教皆稟詔條參以土宜遂其物性
可行必守有弊必除便蠻夷生梗之風慕臣子
盡忠之道力誠不足心實在茲

謝中使送至郡

臣某言中使吐突仕曉至奉宣聖旨慰諭并送
臣至本任者徐山遠郡忽降王人跪受恩榮仰
瞻宸極謝中伏以發自巴峽至于南荒涉水陸湍險
之途當炎夏鬱蒸之候山川縈轉晨夜奔馳幸
無他疾得至本管九重結戀遙傾捧日之心萬
里獲安皆荷自天之祐

賀收蔡州

臣某言伏見詔書以唐州節度使李勣生擒逆賊吳元濟獻俘文武百寮於興安門列班稱賀者天威遠被元惡就誅一方既平萬國咸慶中伏賀惟睿聖文武皇帝陛下德超邃古道合上玄臨御已來天人協贊削平吳蜀掃蕩塞垣車書大同夷狄來貢葺爾元濟敢懷野心輒聚犬羊苟偷時月陛下聖謨獨運睿感潛通天助神兵人生勇氣既擒凶逆遂正刑書伏三紀之逋誅誠九衢之壯觀宗社昭告華夏式瞻行弔伐而在

禮無違但威聲而何城不剋楚氣改色淮水安
流漢上成人盡霑雨露汝南遺老重覩昇平凡
在具臣孰不欣抃臣久辭朝列恭守遐藩不獲
稱慶闕庭陳露丹慊仰瞻宸極倍萬羣品

賀赦

二首

臣伏奉今月一日制書大赦天下者聖德廣運
浹于華夷天光下臨照彼幽壑謝中伏惟睿聖文武
皇帝陛下神扶寶祚天贊鴻猷意有所之事無
不剋當淮右凱旋之後是城中慶幸之時順陽
和以發生施霈澤於寰海網開三面危疑者許

以自新德達四聰瑕累者期於錄用求碩畫於
庶位慮遺材於放臣旌忠烈之家賞勲庸之膺
仁及枯骨無隔於寇戎榮加顯親普霑於存歿
恤刑已責實廩蠲徭頒錫彰有客之詩崇儒協
宗子之望嶽瀆咸秩耆艾飲和大僚承任子之
恩武旅荷賜金之寵斯皆禹湯文武之遺美高
祖太常之耿光集于聖朝然後大備德音所至
和氣隨之歡謠上徹於九天福祚永延於億載
能使遠夷屈膝豈唯小醜革心率土人臣不勝
大慶臣又辭闕下恪守海隅犬馬之誠倍百常品

又

臣某言伏見今月三日制書大赦天下者大明
初昇萬物咸覩渙汗一發神人以和中謝伏惟皇
帝陛下天資睿聖神啓聖期端拱受萬國之朝
承顏奉兩宮之慶初副大位克揚孝心三光協
明和氣來應臣伏讀赦令首於奉園陵盡誠敬
親九族蘇兆人次及定章程止進獻已逋責滌
夙瑕內照于九重則歸嬪嬙放鷹犬外明于四
目則求隱士開直聲柔遠以仁則還其係虜賞
近以禮則澤及後昆菲食遵夏禹之規弋緝法

漢文之儉墜典咸舉舊章再明昇平之期正在
今日發號之始疾於春風殊私所及霈若時雨
臣幸逢昌運歷事五朝出守遐藩僅垂二紀欣
承雷雨作解之澤不勝犬馬懷戀之誠瞻望帝
鄉無任屏營

賀冊皇太子

臣某言伏見冊皇太子盛禮斯畢德音遐宣萬
國以貞庶類咸悅中謝伏惟文武孝德皇帝陛下
體元立極垂訓御時既闡王猷思安國本前星
位定拱宸極以昭彰蒼震氣宣與天地而長久

禮光上鬯澤被華夷宗柝有無疆之休生靈懷
莫大之慶臣恪居官次遐守巴南不獲稱賀闕
庭無任踴躍之至

慰國哀

臣某言上天降禍大行皇帝奄弃萬國奉諱號
擗糜潰五情伏惟皇帝陛下孝思至性攀號罔
極臣恭守所部不獲倍位西宮伏增感慕之至
謹奉表陳慰以聞

賀龍飛

臣某言伏見詔書正月二十六日皇帝陛下嗣

登寶位萬國同歡日月繼明乾坤交泰中伏惟
皇帝陛下欽承顧命懷惟永圖以大孝奉宗祧
以至仁蘇品物洞照寰海統和神人聖祚延長
從今無極羣生鼓舞自此太寧臣守遐藩恪居
官次

賀冊太皇太后

臣某言伏見制書以二月十七日冊立太皇太
右徽章克備慶賜遂行榮冠古今澤周寰海中
伏惟皇帝陛下續承列聖歡奉兩宮太皇太后
含飴保和重光疊慶漢儀盛於長信周祚興於

大任方之聖朝彼有慙德臣遠守巴峽不獲稱慶闕庭

賀冊皇太后

臣某言伏見制書以二月二十五日冊立皇太后盛禮畢陳德音遠被一人有慶萬國同歡

謝中

伏惟皇太后稟靈作配誕聖表祥徽號極域中之君遵仁爲天下之母陛下君臨有國子道無違長樂宮中永獻南山之壽濯龍門上再揚東漢之風率土臣子不勝欣抃

和州謝上

臣某言伏奉制書授臣使持節和州諸軍事守
和州刺史臣自理巴賓不聞善政恩私忽降慶
抃失容謝伏惟皇帝陛下丕承寶祚光闡鴻猷
有漢武天人之姿稟周成睿哲之德發言合古
舉意通神委用得人動植咸悅理平之速從古
無倫微臣何幸獲覩昌運臣業在辭學早歲榮
名德宗尚文擢爲御史出入中外歷事五朝累
承恩光三換符竹在分憂之寄祿秩非輕而素
蓄所長效用無日臣聞一物失所前王軫懷今
逢聖朝豈患無位臣即以今月二十六日到所

任上訖伏以地在江淮俗參吳楚災旱之後綏撫誠難謹當奉宣皇恩慰彼蒸黎乂於其道冀使知方伏乞聖慈俯賜照鑒

賀改元赦

臣某言伏見今月七日制書大赦天下者帝遊出震聖澤如春神人以和天地交泰中伏惟皇帝陛下丕承鴻業光闡睿圖吉日展嚴祀之儀告天陳太平之盛九廟成禮百神降祥鑿輅旋衡風雲改色殊私廣被再弘莫大之恩寶曆惟新更啓無疆之祚兩宮承慶四海永寧率土臣

子上一千萬壽

夔州論利害二首

臣某言伏準元和十二年四月十八日敕諸州
刺史如有利害可言者不限時節任自上表聞
奏者伏見貞觀中詔許羣臣各上書言利便馬
周時布衣遂因中節將常何獻策二十餘事太
宗深竒之盡行其言擢周爲御史至龍朔中壁
州刺史鄧弘慶進平索看精四字堪爲酒令高
宗嘉之亦行其言遷弘慶爲朗州刺史則知苟
有所見雖布衣之賤遠守之微亦可施用況臣

早受國恩德宗朝忝為御史逮今歷事四朝頻
領藩條當陛下至明之時是微臣竭節之日伏
以守在遐郡不敢廣有所陳謹准敕上利害及
當州公務各具別狀以聞伏乞聖慈俯賜照鑒

又

臣某言伏准今年正月五日德音宜令諸道觀
察使刺史各具當處利害附驛以聞者伏惟皇
帝陛下睿哲自天續承列聖善述先志發揚德
音率土人臣不勝慶幸臣虔奉詔旨宣示蒸黎
伏以華夏不同士宜各異詳求利病謹具奏聞

伏乞聖慈俯賜照鑒臣伏覽國史竊見開元十
八年朝集使至京玄宗臨軒親問利害時宣州
刺史裴耀卿上便宜事論轉運甚詳竟不行下
至二十一年耀卿為京兆尹再以前事奏論方
見允納此及三年漕運七百萬石省脚三十餘
萬貫當耀卿前不見納必有人非之及後數年
方展其效臣僻守遠郡敢望言行祗奉詔書或
冀萬一伏惟明主擇之

夔州謝上

臣某言伏奉月日制書授臣使持節都督夔州

諸軍事守夔州刺史跪受天詔神魂震驚臣某中
伏惟文武孝德皇帝陛下垂衣穆清睿鑒旁達
三統交泰百神降祥決于華夷盡致仁壽臣家
本儒素業在藝文貞元年中三忝科第德宗皇
帝記其黨援擢為御史在臺三載例遷省官權
臣奏用分判錢穀竟坐連累貶在遐藩先朝追
還方念淹滯又遭讒嫉出牧遠州家禍所鍾沈
伏草土禮經有制羸疾僅存甘於畎畝以樂皇
化伏遇陛下大明御宇照燭無私念以殘生舉
其彝典獲居善部伏感天慈臣即以今月二日

到任上訖峽水千里巴山萬重空懷向日之心
未有朝天之路無任

賀雪鎮州

臣某言伏見四月二十七日德音以王承宗効
順著明復其官爵所獻二郡別置藩垣聖德動
天鴻恩及物瑕累咸滌蒸黎永安臣某中謝伏惟睿
聖文武皇帝陛下自承寶位克振皇綱既以四
海為家每念一夫不獲昨因大慶爰降昧私廣
宥過之科開自新之路綸言一發神理潛通遂
令迷誤之徒頓釋憂危之慮命省子以入侍獻

名都而效誠臣心既明天網爲解因析四郡別
爲一方惟懷永圖盡去前弊大河以北化爲禮
樂之鄉率土之濱重見昇平之日臣恪居官次
遐守嶺隅不獲稱慶闕庭無任

賀平淄青

臣某言伏見制旨魏博節度使所奏逆賊李師
道并男二人並梟斬訖以二月十六日御宣政
殿受賀者聖德立運兵威神速旬月之內鯨鯢
就誅秦嶽旣寧登封有日臣某中謝伏惟睿聖文
武皇帝陛下有征必克舉意無違天地協神筭

之期雷霆助成師之氣蠢爾孽豎敢生野心蕭
斧一臨妖氛自滅皆由聖慈廣被睿略潛通獻
俘者盡許生還得地者復令安堵感我仁激其
深衷凡是脇從盡思効節五紀巢穴一朝蕩夷
遂使齊魯之鄉復歸仁壽之域捷音旣至傳首
繼來備文物於明庭告殊勲於清廟百辟陳賀
萬方會同從此止戈所以爲武西州士庶方觀
飲至之容東嶽煙雲已望告成之禮臣恪居遠
服常忝班行慶快之誠倍萬群品無任

劉夢得文集卷第十九

表

牋附

代賀冊魯王

代讓官

蘇州謝上

蘇州謝賑貸

賀冊皇太子

賀皇太子受冊牋

賀赦上皇太子牋

代裴相公賀冊魯王

臣某伏見制書以今日冊魯王禮畢皇家有
慶寶祚無疆既榮本枝克固盤石中謝伏惟皇帝
陛下德符列聖道冠前王孝敬承兩宮之歡虔

恭奉九廟之祀先崇大禮慶浹天人次念建封
事并家國伏以魯王夙承睿訓特稟天姿爰以
告辰光膺寵冊既示之以君親之道又錫之以
禮義之邦窠海聞風室家相慶臣自嬰疾病已
歷旬時不獲展禮明庭拜舞稱賀無任

代裴相公讓官

三首
第一表并批荅

臣某言臣去冬得疾近日方劇西夕之景豈能
久留及其未亂披露誠懇臣犬馬之齒六十有
七壽雖不長亦不為短位忝公台近十五年皆
由際會非以才進常懼官謗以招國刑今被病

得死保其始終為幸甚厚豈復咨嗟所恨者遇
聖明之君不得佐成太平之化自量氣力忽恐
奄時則有微素無階上達伏惟聖慈昭鑒憐而
察之中謝伏以三台非曠職之地宰相非卧理之
官伏枕之初已有陳乞請罷真食兼辭貴階伏
蒙優詔纔遂一事頻降中使慰勉再三專令御
醫旦夕診視苟安名器不覺經時主恩則深公
議不可伏思陛下臨御之始宰臣四人逮今零
落忽已一半臣且危懼餘年幾何唯易直外鎮
獨得無恙竊推此理權位難居伏乞賜臣停官

許在家養疾就間辭祿或冀有瘳害盈福謙固
是神理儻天眷綢厚念以伏事多年臣之所陳
未蒙便遂則國朝勲舊以疾辭位者皆得致仕
官使其家居足以頤養既有成例著於舊章伏
望天恩特賜哀允無任

省表具之夫爵位崇高以酬勲德君臣協契
諒在始終斯乃前王之令圖有國之彝典也
況卿輔相憲祖逮于朕躬履歷四朝夷險一
致服事君之大節推致物之深誠道光朝倫
行滿天下倚注之意豈同他人屬朕纂曆御

乾興師伐叛騷動累歲端憂靡遑及河朔載
寧郊丘畢事方欲咨詢元老康靖生靈不虞
寒暑所侵勤勞遘疾雖國醫診視中使省臨
憂屬之誠頃刻在念忽覽章奏退讓官榮雖
知止之心則思避寵而謀猷之體斯乃為時
寢食之間勉加頤攝其所陳乞非朕意焉

第二表

并批荅

臣某言臣所獻章表發於至誠伏奉批荅未蒙
俞允外負公責內迫私情祈於必遂敢守難奪
中謝臣束髮已來號為強力及其晚節亦未甚衰

一
朝被病遂至綿惛臣自思省得其端倪非因
飲食不節無有霧露之犯蓋由才微而任重功
薄而賞厚竊位既久妨賢則多以積年之過幸
致今日之沈疾不能酌損所以生災悟雖已晚
情實非矯伏惟陛下念其委使之久察其危苦
之詞特降深恩救臣不逮無冒榮之咎得遂性
之宜物議不形病心自泰忍死俟命披肝再陳
伏乞聖慈俯賜容納無任

省表具之卿勲績高崇誠節忠盡秉心一德
宣力四朝訏謨緝熙弼于予理勤勞事國啓

沃匪躬功格道光常所嘉尚所疾未瘳勉於
繕食勿藥之喜佇即痊平台衮之司倚卿爲
重及累陳讓殊謂不然宜體朕懷即斷來表

第三表

并批荅

臣某言得疾踰年在假三月再有陳請未蒙允
從慮其奄忽銜愧入地伏惟聖慈哀而信之

中謝

臣聞君之使臣在知其心而聽其言不以容尸
祿爲惠也臣之事君在無隱情而盡忠節不以
受非據爲榮也然後上下交感終始可詠臣伏
事陛下五年于茲葵藿微誠已蒙識察桑榆暮

景所冀哀憐豈令危懼之時更懼滿盈之禍雖
有藥石安能調和聖日難逢生涯漸短體羸無
拜舞之望心在有涕戀之悲臣伏覽國書備見
前事太宗朝李靖高祖朝劉仁軌皆自宰臣乞
骸致政其後知猶可用復起于家進退之間曲
盡情禮君臣之際良史美談伏望陛下悉臣至
誠念臣羸病許遂頤養以保餘年俟其有瘳或
冀萬一無任

省表具悉謝病之制雖起於昔賢盡瘁之詞
亦標於古典况卿有功於國作相累朝自匡

輔眇身又勤勞數載豈可以微疾去位以重
望辭榮章疏徒來延遲彌切至如太宗許李
靖致政高宗遂仁軌乞骸朕非不知事則有
異何者時當明聖在上理道已成宰臣優游
固得自便今則生物尚困庶工未循言念勲
賢方深倚注惟此故事恐難遽行卿宜體是
誠懷力更頤養必有多福以扶大忠無至確
然復陳章表

蘇州謝上

臣某言伏奉制書授臣蘇州刺史始從郎署出

領郡章承命若驚省躬知感謝中伏惟皇帝陛下
受上玄之眷佑揚列聖之耿光大康黎元慎擇
牧守德音每發品物咸蘇臣本書生素無黨援
謬以薄伎三登文科德宗皇帝擢為御史在臺
三載例轉省官永貞之初權臣領務遂奏錄用
蓋聞虛名唯守職業實無朋附竟坐飛語貶在
遐藩憲宗皇帝後知事情却授刺史凡歷外任
二十餘年伏遇陛下應運重光物無廢滯收拾
耆舊塵忝班行既幸逢時常思展效在集賢院
四換星霜進供御書二十餘卷儒臣之分甘老

於典墳優詔忽臨又委之符竹分憂誠重戀闕
滋深石室之書空留筆札金闈之籍已去姓名
本末可明申雪無路豈意聖慈弘納不隔卑微
面辭之日特許外殿天顏咫尺臣禮兢惶不敢
盡言空懷誠懇謝恩而出生光於九陌之間受
訓而行布政於五湖之外臣即以今月初六日
到任上訖伏以水災之後物力索空臣謹宣皇
風慰彼黎庶臣聞有味之物蠹蟲必生有才之
人讒言必至事理如此古今同途了然辨之唯
在明聖伏惟陛下察臣此言則天下之人無不

幸甚江海遠地孤危小臣雖雨露之恩幽遐必
被而犬馬之戀親近爲榮無任

蘇州謝賑賜

臣某言伏奉去年二月十五日敕蘇州宣賜米
一十二萬碩委刺史據戶均給者恩降九天澤
流萬姓伏以臣當州去年災沴尤甚水潦雖退
流亡尚多臣前月到任奉宣聖旨百闔境老幼無
不涕零詢訪里閭備知凋瘵方具事實便欲奏
論聖慈憂人照燭幽遠特有賑卹救其災荒蒼
生荷再造之恩儉歲同有年之慶臣忝爲長吏

倍萬常情無任

蘇州賀冊皇太子

臣某言伏奉制書以今月七日冊皇太子德音
遐布盛禮畢陳國本永安人心同慶賀中伏惟皇
帝陛下以繼天之聖有知子之明義兼君親禮
重宗祏龍樓肇建展嘉禮於三朝鳳曆延長固
本枝於萬葉臣守在遐郡不獲稱慶闕庭無任

賀皇太子受冊牋 二首

朝議大夫持節蘇州諸軍事守蘇州刺史上柱
國劉某叩頭叩頭伏惟皇太子殿下允膺上嗣

光啓東朝蒼蒼震發前星之輝黃鸞表重輪之瑞
位居守器禮重承祧萬國以貞九圍咸悅無任

又

使持節都督夔州刺史劉某叩頭伏惟皇太子
殿下祗膺詔冊光啓儲闈展至性於三朝承本
枝於百代宗祏永固神人以和四嶽仰搖山之
高百川承少海之潤無任

賀赦上皇太子牋

使持節連州諸軍事守連州刺史劉某惶恐叩
頭伏見今月一日制書大赦天下者伏以獻歲

布和皇恩遠降乾坤交泰寰海廓清伏惟皇太子殿下道冠元良德兼忠孝承顏拜慶榮耀古今某職守有限不獲隨例稱賀宮庭無任

劉夢得文集卷第十九

開化圖書館
Wakuhwa Library

劉夢得文集卷第二十

表

謝加章服

賀皇帝疾愈

汝州謝上

同州謝上

賀臬斬鄭注

賀德音

賀赦

謝恩賜粟麥

慰淄王薨

謝放先貸斛斛

謝分司東都

蘇州謝恩賜加章服

大和七年

臣某言伏奉去年十一月二十七日詔書加臣

賜紫金魚袋餘如故者恩降重霄榮霑陋質虛
黷陟明之典恐興彼己之詩寵過若驚喜深生

懼

中謝

臣起自書生業文入仕德宗朝為御史

以孤直在臺順宗朝為郎官以緣累出省憲宗
皇帝後知其寃特降敕書追赴京國緣有虛稱
恐居清班務進者爭先上封者潛毀巧言易信
孤憤難伸俄復一麾外轉三郡伏遇陛下膺期
御宇大振滯淹哀臣宿舊猥見收拾職兼書殿
官忝儀曹微勞未宣薄命多故又離省署重領
郡符延英面辭親承教誨銜命即路星言載馳

到任之初便逢災疫奉宣聖澤恭守詔條上稟
睿謀下求人瘼才術雖短憂勞則深幸免沓離
漸臻完復皆承聖化所及遂使人心獲安豈由
微臣薄劣能致臣素乏親黨家本孤貧年衰無
酒色之娛性拙無博奕之藝自領大郡又逢時
災晝夜苦心寢食忘味曾經誣毀每事防虞唯
託神明更無媒援豈期片善上達宸聰回日月
之重光燭江湖之下國絲綸褒異苦節旣彰印
綬煒煌老容如少望雲天而拜舞豈盡丹誠視
環球以徘徊空嗟白首無任

蘇州賀皇帝疾愈

大和八年正月二十八日

臣某言臣得本道觀察使報伏承聖躬痊愈已於紫宸殿視朝者一人有慶萬國同歡中賀伏惟皇帝陛下外親萬務內奉三宮常懷宵旰之勤遂失寢興之適上立降祐列聖表靈百神奔走以來扶四海精誠而致感勿藥有喜如山永安宗廟保無疆之休寔瀛中莫大之慶臣恪居官次遐守江干不獲稱賀闕庭無任

汝州謝上

臣某言伏奉去年七月十四日詔書授臣使持

節汝州諸軍事守汝州刺史兼御史中丞充本
道防禦使餘如故者臣久居遠服戀闕常深忽
降新恩近鄉爲貴承旨慶抃省躬慙惶謝中伏惟
皇帝陛下垂衣穆清之中旁照寰瀛之內車書
所及動植咸安臣昨離班行遠守江徼延英辭
日親奉德音知臣所部災荒許臣到任條奏共
承睿旨宣示羣黎減其征徭頒以賑賜伏蒙聖
澤救此天災疲羸再蘇幼艾同感二年連遭水
潦百姓幸免流離比之交割之時戶口增長雖
才術不至於事未周而憂勞則深爲衆所悉臣

本業儒素頻登文科時命遭迴再領軍郡即以
今月二十七日到任上訖謹當奉宣皇化慰彼
蒼生臨汝海之波朝宗尚阻望秦城之日回照
何時無任

同州謝上

并批荅

臣某言伏奉去年十月二十三日制書授臣使
持節同州諸軍事守同州刺史兼御史中丞充
本州防禦長春宮等使恩降九重榮忝三輔承
旨慶抃省躬慙惶中謝伏惟皇帝陛下丕承烈
聖光闡鴻猷氛祲掃除乾坤交泰臣幸逢昌運

累沐殊私空荷生成之恩寧酬雨露之澤即以
今月二日到本州上訖謹宣睿旨安慰蒸黎伏
以本州四年已來連遭旱損閭閻凋瘵遠近共
知臣頃任蘇州之年亦遭大水之後面辭之日
親奉德音至於撫綏皆承聖教二年之後百姓
獲安今本部災荒物力困涸忝爲長吏敢不竭
誠即須條疏續具聞奏臣恪居官次幸接玉畿
不獲拜舞彤庭陳露丹慊犬馬懷戀寢興匪寧
瞻魏闕之容朝天尚阻望長安之路近日爲榮
無任

批荅省表具之卿任居三輔職奉六條累聞
問俗之勞載覽勤人之志言惟顧行深慰朕
懷勉引政經以副憂寄所謝知

賀梟斬鄭注

大和九年

臣某言伏奉前月二十五日詔書示逆賊鄭注
已梟首訖氛祆殄滅華夏乂安中賀伏以逆賊
鄭注本出細微潛懷梟鏡之心兼結凶狂之黨
人倫共弃神理不容陛下睿哲感通天人合應
重臣協力禁旅齊心指顧之間猖狂自潰乾坤
交泰日月增明凡在人臣不勝慶快臣恪居官

次不獲稱賀闕庭無任

賀德音

臣某言伏見今月十六日德音布告遐邇天道
下濟人情大安中賀伏惟皇帝陛下凝旒思理
垂衣擇材以日月無私之光照寰區有截之內
貴使下情盡達寧虞厚貌潛謀一昨李訓鄭注
等敢有逆心兼連凶黨陛下睿謀神斷左右協
同頃刻之間掃除已定重臣畢力禁旅竭忠氛
祲廓清華夷咸悅言念政刑之外或有誑誤之
徒再發德音廣宣聖澤當星紀回天之日迎陽

和煦物之光懷危疑者如山之安欲告訐者望
風知懼非同謀者一切不問未結正者三宥從
寬含生之倫普天同感臣恪居官次不獲稱賀
闕庭無任

賀赦

臣某言伏奉今月一日制書改大和十年爲開
成元年大赦天下者雷雨作解人神悅隨澤及
八荒網開三面中賀伏惟皇帝陛下上承乾綱
下立人極用含弘光大之澤副夷夏會同之心
獻歲改元惟新景祚先明首罪次及羣桀述睿

情以曉萬方施鴻霈以蘇庶物恤辜宥過已責
弛征郡縣之舊弊悉除賦稅之新規咸備停藩
方節獻之禮以惠疲人回權管餘羨之財以資
京邑命使展澄清之志察言求讜直之材弓旌
賁于丘園粟帛頒於耆艾爰以初吉御宇明庭
德音一發於九天和氣驟周於四海開物成務
實表於建元應天順人永延於億載臣幸居近
輔先受殊恩不獲稱慶闕庭陪榮班次衆星列
位常拱北辰之光新歲拜章遙獻南山之壽無
任抃躍屏營之至

謝恩賜粟麥

臣某言伏奉今月一日制書以臣當州連年歉
旱特放開成年夏青苗錢并賜斛斛六萬碩仰
長吏逐急濟用不得非時量有抽歛於百姓者
恩降九天澤周萬姓優詔纔下羣情頓安中謝伏
以災沴流行陰陽常數物力既竭人心匪遑輒
敢奏聞本求貸借皇恩廣被立造曲成既貸在
田之征仍頒發廩之賜臣謹宣赦文節目彰示
兆人鼓舞歡謠自中徂外臣初到所部便遇儉
時今蒙聖慈特有賑恤主恩及物已爲壽域之

人衆意感天必有豐年之應臣恪居官業不獲
拜舞闕庭無任

慰淄王薨

臣某言臣得進奏官楊惕狀報淄王薨輟朝三
日中慰伏惟皇帝陛下德邁前王情深近屬憫
枝葉之謝諒切宸衷割肌膚之愛何堪聖念萬
方知化九族歸仁凡受國恩伏深悽惻臣限以
藩守不獲奉慰闕庭無任

謝受恩放先貸斛斛

臣某言臣奉五月二十九日敕牒據度支所奏

諸道節度觀察使及州府借便省司錢物斛斛
等數內當州欠三萬六千二十三貫石並放免
者殊私忽降逋責滌除藩方永安遐邇咸悅謝中
伏以關輔之間頻年歉旱田租既須矜放公用
遂不支持承前長吏例有借便以救一時之急
皆成積欠之名既未支填常懷憂懼聖恩周洽
洞見物情爰命有司使之條奏去其舊弊衆已
獲安嚴立新規人知所措臣恪居官次不獲拜
舞闕庭無任

謝分司東都

臣某言伏奉今月十九日制書授臣太子賓客
分司東都者寵命自天戰越無地中謝臣發迹
書生以文爲業出身入仕四十餘年頃自集賢
學士出守吳郡面辭之日親承德音念百姓水
潦之餘示微臣政理之法臣祇膺聖旨夙夜竭
誠閭里獲安流庸盡復猥蒙朝獎錫以金章及
遷同州又遇歉旱悉心綏撫幸免流離今荷天
慈憫臣者舊列名賓護之職分局河洛之都老
馬霜束帛之恩枯株蒙雨露之澤獲居榮秩以
畢餘年顧此微軀實爲厚幸伏以臣始爲御史

遼事德宗今忝宮僚幸逢聖日舉四海之內賢
能則多求六朝之臣零落將盡雖迫桑榆之景
猶傾葵藿之心無任

劉夢得文集卷第二十

劉夢得文集卷第二十一

啓

上杜司徒

上淮南李相公

上門下武相公

上中書李相公

謝門下武相公

謝中書張相公

賀門下裴相公

上門下裴相公

賀門下李相公

上僕射李相公

謝裴相公

謝竇相公

上杜司徒

某啓一自謫居七悲秋氣越聲長苦聽者誰哀

湯網雖踈久而猶挂失意多病衰不待年心如
寒灰頭有白髮惕厲之日利於退藏是以彌年
不敢奏記近本州徐使君至奉手筆一函稱謂
不移問評加劇重復點竄一無客言忽疑此身
猶在門下收紙長想歆然感生尋省遭罹萬重
不幸方寸之地自不能言求人見諒豈復容易
伏蒙遠示且曰浮謗漸消況承慶宥期以振刷
方今聖賢合德朝野多歡澤柔異類仁及行葦
萬族咸悅獨為窮人四時平分未變寒谷自同
類牽復又已三年側聞衆情或似哀歎某材略

無取廢錮是宜若非舊恩孰肯留念六朔方鍛
思重託於扶搖孤桐半焦冀見收於煨燼伏紙
流涕不知所言謹啓

上淮南李相公

某啓間以昧於周身措足危地駭機一發浮謗
如川巧言竒中別白無路祝網之日漏恩者三
咋舌兢魂分終裔壤豈意天未剿絕仁人登庸
施一陽於剝極之際援衆溺於坎深之下南箕
播物不勝願言危心鍛翻繇是自保陰施之德
已然乃聞受恩同人明以死荅私感竊抃積于

窮年化權禮絕孤志莫展今幸伍中牽復司存
宇下伏慮因是記其姓名謹獻詩二篇敢聞左
右古之所以導下情而通比興者必文其言以
表之雖眊謠俚音可儷風什伏惟降意詳擇斯
大幸也謹因楊子程留後行謹奉啓不宣謹啓

上門下武相公

某啓去年本州吏人自蜀還伏奉示問兼賜衣
服繒絲等雲水路遙緘滕貺厚恭承惠下之旨
重以念舊之懷熙如陽和列在緗簡苦心多感
危涕自零驚神驛思若侍函杖伏以聖上注意

理本銳求國楨念外臺報政之功追宣室前席
之事重下丹詔再昇黃樞羣情合符和氣來應
八柄所在三人同心協台坐之精膺保一作傑材之
數談笑於規隨之際從容於陶冶之間物皆由
儀人識所措某久罹憲網兀若枯株當萬類咸
悅之辰抱窮途終慟之苦清朝無絳灌之列至
理絕椒蘭之嫌此時不遇可以言命嗟乎一身
主祀萬里望枌榆之鄉高堂有親九年居蠻貊
之地從坐之典固有等差同類之中又尋牽復
頃在臺日獲奉準繩指吏途於桉讞道文律於

章奏藻鑿之下難逃陋容炎涼載一作幾移足見真
態自違間左右沈淪遐荒歲月滋深艱貞彌厲
緬思受譴之始他人不知屬山園事繁孱懦力
竭本使有內嬖之吏供司有恃寵之臣言涉猜
嫌動礙關束城社之勢函矢紛然彌縫其間崎
嶇備盡始慮罪同事闕寧虞謗逐跡生智乏周
身又誰咎也伏以趙國公頃承顧遇之重高邑
公夙荷見知之深雖提挈不忘而顯白無自蓋
以永貞之際皆在外方雖得傳聞莫詳本末特
哀黨錮亟形話言自前歲振淹命行中止或聞

輿論亦愍重傷伏遇相公秉鈞輒已自賀儻重
言一發清議攸同使聖朝無錮人大冶無廢物
自新之路既廣好生之德遠彰羣螯應南山之
雷窮鱗得西江之水指顧之內生成可期伏惟
發膚寸之陰成彌天之澤回一瞬之念致再造
之恩誠無補於多事之時庶有助於陰施之德
無任懇悃之至謹啓

上中書李相公

緯

某啓去年國子主簿楊歸厚致書相慶伏承相
公言及廢錮愍色甚深哀仲朔之夕謫恕元直

之方寸思振淹之道廣錫類之人遠聆一言如
授華衮自不窺牆仞九年于茲高卑邈殊禮數
懸絕雖身居廢地而心恃至公伏以相公久以
訐謨參于宥密梓旣爲時而出道以得君而專
令發於流水之源化行猶偃草之易習強仇者
自納於軌物困杼柚者咸躋於仁壽六轡在手
平衡居心運思於陶冶之間宣猷於魚水之際
然能軫念廢物遠哀窮途嗟哉小生有足悲者
內無手足之助外乏強近之親何爲學苦心本
求榮養得罪由已翻乃貽憂捫躬自刻愧入肌

骨禍起飛語刑極淪胥心因病怯氣以愁耗近
者否運將泰仁人持衡伏惟推曾閔之懷憐烏
鳥之志處夔龍之位傷屈賈之心沛然垂光昭
振幽摯言出口吻澤濡寰區昔者行葦勿傷枯
骼猶掩哀老以出幣愍窮而開懷無情異類尚
或嬰慮顧惟江干逐客曾是相府故人言念材
能誠無所取譬諸飛走庸或知恩嗚呼以不駐
之光陰抱無涯之憂悔當可封之至理爲永廢
之窮人聞弦尚驚危心不定垂耳斯久長鳴孔
悲腸回淚盡言不宣意謹啓

謝門下武相公

某啓其一坐飛語廢錮十年昨蒙徵還重罹不幸詔命始下周章失圖吞聲咋舌顯白無路豈謂烏鳥微志惻于深仁恤然動拯溺之懷煦然存道舊之旨言念斛觶慰安蒼黃推以恕心期於造膝重言一發睿聽克從回陽曜於肅殺之辰沃天波於蹭蹬之際俾移善地獲奉安輿率土知孝治之源羣生識人倫之厚感召和氣發揚皇風豈唯匹夫獨受其賜某即以今月十一日到州上訖守在要荒拘於印綬巾鞬詣謝有

志莫從誠知微生不足酬德捐軀之外無地寄
言効節蕭屏虔然心禱無任懇悃屏營之至謹
勒軍事衙官守左威衛慈州吉昌府別將負外
置同正負常懇六云奉啓

謝中書張相公

某啓某智乏周身動必招悔一坐飛語如衝一作觸
駭機昨者詔書始下驚懼失次叫闔無路擠壑
是虞草木賤軀誠不足惜烏鳥微志實有可哀
伏蒙聖慈遽寢前命移莅善部載形綸言凡在
人臣皆感至德凡爲人子同荷至仁豈唯鰥生

獨受其賜伏以相公心符上德道冠至仁一夫
不獲戚見于色密旨未下歎形于言竟回三舍
之光能拔九泉之厄素公之平楚獄不忍錮人
晏子之哀越石仍伸知己所以慶垂脣祚言成
春秋神理孔昭報應斯必身侔蟬翼何以受恩
死輕鴻毛固得其所卑守有限拜謝未由無任
感激兢惶之至謹勒軍事衙官守左威衛慈州
吉昌府別將負外置同正負常懇云云奉啓

賀門下裴相公

某啓伏以相公含道傑出降神挺生坐籌以弼

睿謨秉鉞以行天討風雲助氣川嶽效靈制勝
於樽俎之間指蹤於鞬縶之末蕭斧既定衮衣
以歸君心如魚水人望如風草一德交暢萬邦
一作方和平運神思於洪鑪納生靈於壽域文武丕
績冠于古今某恪守遐荒不獲隨例拜賀

上門下裴相公

某啓曩者淮右逋誅即戎歲久天子齋戒以命
元臣登壇之日上略前定從九天而下縱以神
兵分六符之光掃其長彗授鉞於西顛之半策
勲於北陸之初功成偃節復執大柄君臣相遇

播于樂章山河啓封載在盟府上方注意人益
具瞻因魚水之協符極夔龍之事業時屬四始
恩覃萬方致君及物其得一作德兩大古先俊賢所
未備者我從容而保之殆非人事抑有幽贊夫
異同之論我以獨見剖之文武之道我以全材
統之崇高之位我以大功居之造物之權我以
虛心運之然持盈之術古所難也寔在陰施拯
物厚其德基以左右功庸而百祿是荷人所欽
戴久而愈宜昔素太尉不忍錮人而楚獄衰息
一言之慶子孫丕承以今日將明之材行前脩

博施之義筆端膚寸澤及九垓猶夫疾耕必有
滯穗某頃墮危厄嘗受厚恩詛盟於心要之自
效嘗懼廢死萊服永辜願言敢因賀牋一寄丹
懇顧非竒理不足以縈于冲襟然則利於行者
固在乎常談而卓詭孤特之言未必利於行也
伏惟以愚言與賢者參之

賀門下李相公

自西川入為
大夫拜相

某啓伏以聖君當功成愷樂之日而求賢愈切
思治益深是上玄垂休欲速致大平之明效以
相公事業而逢此時天下之人視仁壽之域其

猶尋尺故命書所至德風隨之微材片善咸自
磨拂況同主國柄如吹埴篔簹含生之倫唯所措
置日月亭午物無邪陰賢聖合德人識正道雖
居畎畝足以詠歌某遐守要荒不獲隨例拜賀

上僕射李相公

某啓州吏還伏蒙擺落常態手筆具書言及貞
元中登朝人逮今無十輩及發中書相公一函
具道閣下亟言曩游顏間頗有哀色夫溝中之
木與犧象同體追琢不至坐成枯薪朱而藍之
猶足爲器苟液滿曲戾不足枉斧斤願爲庭燎

以照嘉客謹啓

謝裴相公

某啓某遭不幸歲將二紀雖累更符竹而未出
網羅親知見憐或有論薦如陷還潭動而愈沈
甘心終否無路自奮豈意天未剗絕仁人持衡
紆神慮於多方起湮沈於久廢居剥極之際一
陽復生出坎深之中平路資始通籍郎位分曹
樂都喬木展舊國之思行雲有故山之戀姻族
相賀壺觴盈門官無責詞始自今日禽魚之志
誓以死生草木之年惜其婉婉章程有守拜謝

無由瞻望巖廊虔然心禱謹啓

謝竇相公

某啓某一辭朝列二十三年雖轉郡符未離謫籍卑濕生疾衰遲鮮歡望故國而未歸一作如痿人之念起昨蒙罷免甘守丘園相公不棄舊游特哀以廢每奉華翰賜之衷言果蒙新恩重忝清貫薦延有漸拯拔多方六律變窮谷之寒一丸消彌年之疹鍛翻將舉危心獲安布武夷途自此而始分曹有繫拜謝無由瞻望德藩坐馳精爽無任

劉夢得文集卷第二十一

開化圖書館
Kainua Library

開化圖書館

Wanhsua Library

開化圖書館

Kaichua library

開化圖書館

Kaichua library

蓮

開化圖書館

kaikwa library

開化圖書館

Kaithwa Library

Blue Cyan Green Yellow Red Magenta White 3/Color

© The Tiffen Company, 2007

TIFFEN Color Control Patches

Centimetres

1 2 3 4 5 6 7 8 9 10 11 12 13 14 15 16 17
1 2 3 4 5 6 7 8 9 10 11 12 13 14 15 16 17
Inches




劉夢得文集

四

開化圖書館
Kashima Library

開化圖書

Maehwa Library



TIFFEN Color Control Patches

© The Tiffen Company, 2007

Blue Cyan Green Yellow Red Magenta White 3/Color